



METERAI: Hajiji (tengah) menyaksikan MoU yang ditandatangani UMS dan Switch di Dewan Bankuasi UMS.

UMS, Switch perkasa teknologi digital

Meterai MoU bagi merealisasikan objektif Dasar Pendidikan Tinggi Negara bagi meningkatkan kemahiran teknikal
UB 03.10.2024 P.06

KOTA KINABALU: Universiti Malaysia Sabah (UMS) terus memperkukuh jalinan kerjasama dengan pihak teknologi digital melalui memorandum persefahaman (MoU) bersama Switch (Apple Premium Partners).

Naib Canselor UMS, Profesor Datuk Dr. Kasim Hj. Mansor, berkata kerjasama itu antara lain bertujuan merealisasikan objektif Dasar Pendidikan Tinggi Negara bagi meningkatkan kemahiran teknikal.

Katanya, MoU selama tiga tahun itu merupakan inisiatif untuk memastikan warga UMS dan graduan memiliki kemahiran teknikal yang relevan dalam industri.

Beliau turut menzahirkan ucapan tahniah kepada Timbalan Naib Canselor (Akademik dan Antarabangsa) serta Pusat e-Pembelajaran UMS atas usaha memperkukuh kandungan kreatif untuk kegunaan pengajaran dan pembelajaran.

“Ini merupakan kali pertama majlis menandatangani MoU diadakan oleh Apple Premium Partners dengan agensi pendidikan di Borneo.

“MoU UMS dan industri teknologi Apple dijangka memberi impak tinggi dalam pembangunan kandungan kurikulum dengan teknologi iOS, latihan praktikal, sesi khas dan bengkel, sumber pembelajaran, serta jaringan dan kolaborasi,” katanya.

Kasim berkata UMS komited untuk menggalas serta merealisasikan dasar dan hasrat kerajaan mendigitalkan Malaysia dalam semua sektor.

“MoU ini turut menggariskan hasrat untuk memberikan akses kepada teknologi dan pembangunan kandungan digital ke arah pendigitalan,” katanya.

Mengulas lanjut, Kasim berkata, usaha itu membuka potensi kepada seluruh anak-anak di Sabah untuk memacu inovasi, mengubah industri dan membentuk

Malaysia yang lebih terhubung.

“Semua yang kita lihat sekarang bukan sekadar kemajuan teknologi semata-mata, tetapi lebih kepada masa depan inovasi, keterhubungan serta pembangunan sosioekonomi,” katanya.

Pada MoU itu, UMS diwakili Kasim dan Pendaftar, Luqman Ridha Anwar, manakala Switch diwakili Pengurus Kanan Perniagaan Switch, Goh Shen U dan Pengurus Kanan Jualan Korporat Switch, Nur A’shikin Kamal Shah.

Turut menyaksikan penandatanganan MoU itu Ketua Menteri Sabah merangkap Pro-Canselor UMS, Datuk Seri Panglima Haji Hajiji Haji Noor; Pengerusi Lembaga Pengarah UMS, Datuk Seri Panglima Abdul Rahman Dahlan; Pengurus Perniagaan dan Pendidikan Apple, Kartini Mohd. Basri serta Pengurus Kepimpinan dan Pembelajaran Apple, Wan Noraini Wan Daud.